

## Tinggalkan Keraguan

Daripada Hasan bin Ali R.Anhuma, Rasulullah SAW bersabda:

دَعُ مَا يَرِيئُكَ، إِلَى مَا لَا يَرِيئُكَ، فَإِنَّ الصِّدْقَ طَمَآنِيئَةٌ، وَإِنَّ الكَذِبَ رِيئَةٌ.

**Maksudnya:** "Tinggallah apa yang menjadi keraguan padamu kepada yang tidak meragukan. Maka sesungguhnya kebenaran itu adalah ketenangan dan sesungguhnya dusta itu adalah keraguan."


Riwayat al-Tirmizi dalam Sunan (4/668) no. (2518)  
Kitab Sifat Kiamat, al-Nasaie dalam Sunan (4/732)  
no. (5727) Kitab al-Asyribah.

### Pedoman dan Iktibar Hadis

Antaranya:

1. Islam mengajak manusia supaya membina sesuatu perkara termasuk akidah dan amalan atas keyakinan tanpa syak dan ragu-ragu. Hal ini menjadikan ulama meletak dalam *qawaid fiqhiyah*nya asas pembinaan hukum dengan yakin bukannya syak waham dan ragu-ragu.
2. Para ulama mengkategorikan tanggapan seseorang tentang sesuatu kepada 5 bahagian:
  - i. Ilmu iaitu mengetahui sesuatu dengan yakin tanpa berubah-ubah, dan bertepatan pula dengan keadaannya yang sebenar berdasarkan tanggapan deria akal atau adat kebiasaan sesuatu itu.
  - ii. *Zan* iaitu mempercayai sesuatu berdasarkan dalil-dalil yang tertentu, tanpa yakin.

- iii. *Syak* iaitu tahap mempercayai sesuatu dan tidak mempercayainya adalah sama. Imam al-Ghazali mengatakan *syak ialah dua kepercayaan yang sebab kedua duanya adalah sama*.
- iv. *Waham* iaitu tidak mempercayai sesuatu lebih daripada mempercayainya. Ia berlawanan dengan *zan*.
- v. *Jahil*. Para ulama membahagikan *jahil* kepada dua:
- *Jahil nyata البسيط* iaitu tidak mempunyai sebarang maklumat.
  - *Jahil berganda المركب* iaitu mengetahui sesuatu tidak bertetapan dengan keadaannya yang sebenar.
6. Walaubagaimanapun, terdapat golongan ulama yang menambah iktikad sebagai bahagian yang keenam dan mendefinisikannya sebagai mengetahui sesuatu dengan yakin.
7. Namun, ianya boleh berubah-ubah kerana tidak berasaskan deria, akal, atau adat. Mereka juga meletakkannya di tempat kedua selepas ilmu dan membahagikannya kepada dua bahagian:
- i. Iktikad yang betul iaitu kepercayaan yang menepati keadaannya yang sebenar.
  - ii. Iktikad yang salah iaitu kepercayaan yang tidak menepati keadaannya yang sebenar.
3. Iktikad yang betul boleh meningkat ke tahap ilmu yang meyakinkan sekiranya maklumat yang didapati berdasarkan dalil. Sebenarnya meninggalkan keraguan bukan hanya terbatas kepada masalah iman sahaja tetapi ianya hendaklah diasaskan dalam semua aspek kehidupan.
4. Begitu juga meninggalkan keraguan menjadikan seseorang itu begitu utuh dan kuat keyakinannya. Justeru, seseorang itu akan boleh menapak ke hadapan untuk mencapai kejayaan yang gemilang dalam hidup mereka. Inilah natijah daripada meninggalkan keraguan.



### Mutiara Hikmah

- ❖ **Pujangga berkata:** Orang yang bahagia adalah orang yang boleh mengambil pelajaran dari hari kelmarin, berinstropeksi terhadap diri sendiri, mempersiapkan diri untuk kehidupan kubur dan selalu merasa diawasi oleh Allah SWT sama ada ketika di dalam keadaan terang-terangan ataupun tersembunyi.
- ❖ **Pujangga berkata:** Kejayaan adalah titisan-titisan daripada kerja kuat, penderitaan, luka, pengorbanan dan kecemasan. Sedangkan kegagalan adalah titisan-titisan dari kemalasan, tidak mempunyai agregat dan tidak berghairah.

### Kisah Teladan

Allah SWT telah menciptakan makhluk-makhlukNya. Dia sentiasa menjaga dan menguasai mereka. Dan tidaklah ada seekor binatang pun di permukaan bumi ini melainkan Allah yang akan memberikan rezekinya. Ketika Nabi Yaakub AS kehilangan anaknya Yusuf AS, katanya:

قَالَ هَلْ ءَامَنُكُمْ عَلَيْهِ إِلَّا كَمَا ءَامَنُكُمْ عَلَىٰ أَخِيهِ مِن قَبْلُ ۗ فَاللَّهُ خَيْرٌ حَافِظًا  
وَهُوَ أَرْحَمُ الرَّاحِمِينَ

**Maksudnya:** *Jika aku lepaskan dia pergi bersama-sama kamu, aku tidak menaruh kepercayaan kepada kamu menjaganya melainkan seperti kepercayaanku kepada kamu menjaga saudaranya dahulu (yang telah kamu hampakan). Oleh itu, aku menaruh harapan kepercayaan kepada Allah SWT, kerana Allah adalah sebaik-baik Penjaga dan Dia adalah Maha Penyayang di antara para penyayang.*

(Surah Yusuf: 64)

Ada kisah perihal seorang lelaki pernah melihat seekor burung terbang dari satu pohon ke pohon yang lain, di dalam mulutnya ada selonggok daging dan dibawanya ke puncak pohon kurma, maka lelaki itu naik ke puncaknya.

Tiba-tiba dia dapati ada seekor ular tua dan buta pada pucuk pohon kurma tersebut, apabila ular itu mendekatinya atau mengganggunya, maka ular itu akan membuka mulutnya.

Seekor ular tua dan buta rezekinya telah menghantarnya sampai pada pucuk pohon kurma tersebut melalui seekor burung. Siapakah yang memberi petunjuk kepada burung tersebut? Dia itu adalah Zat Yang Maha Esa lagi Maha Hidup serta Maha Mengatur semua urusan makhluk-Nya, Tuhan daripada ular itu!

